

२ कुरिन्थिमान

१ परमेश्वर केर ईच्छा से मसीह यीशु केर प्रेरित पौलुस तथा हमार भाई तिमुथियुस केर ओर से कुरिन्थुस परमेश्वर केर कलीसिया तथा अखाया केर समूचा क्षेत्र केर पवित्र आदमीमान केर नाम में:

१हमार परमपिता परमेश्वर आउर प्रभु यीशु मसीह केर ओर से तोहरे के अनुग्रह आउर शांति मिलोक।

पौलुस केर परमेश्वर के धन्यवाद

१हमार प्रभु यीशु मसीह केर परमपिता परमेश्वर धन्य आहे। उ करुणा केर स्वामी हेके आउर आनन्द केर झारिया हेके। १हमार हर विपत्ति में उ हमरे के शांति देवेला ताकि हमरे भी हर प्रकार केर विपत्ति में पडाल आदमीमान के वैसानेहे शांति देवेक पारबोई, जैसान परमेश्वर हमरे के देईहे। ५काहेकि जैसान मसीह केर यातनामान में हमरे सहभागी आही, वैसानेहे मसीह केर द्वारा हमार आनन्द भी तोहरे केर लाई उमडत आहे। ६यदि हमरे कष्ट उठाईला होले उसोउब तोहरे केर आनन्द आउर उद्धार केर लाई हेके। यदि हमरे आनन्दित आहि होले उतु तोहरे केर आनन्द केर लाई हेके। ई आनन्द ओहे यातनामान केर जेसोउब के हमरे भी सहाथी तोहरे के धीरज केर सागें सहेक केर प्रेरित करेला। ७तोहरे केर बिषय में हमार पूरा आशरा आहे काहेकि हमरे जानिला कि जैसान हमार कष्टमान के तोहरे बाँटाला, वैसानेहे हमार आनन्द में भी तोहरे केर भाग आहे।

८हे भाईमान, हमरे येहे के चाहाती कि तोहरे उसोउब यातनामान केर बारे में जाना जेसोउब हमरे के एशिया में झेलेक होए राहे। हुवाँ हमरे, हमार सहनशक्ति केर सीमा से कहीं अधिक बोझ निचे दईब जाए राही। हिझाँ तक कि हमरे केर जीएक तक केर कोनो आशरा नी बईच राहे। ९हाँ अपन-अपन मन में हमरे के ऐसान लगात राहे जैसान कि हमरे के मृत्युदण्ड देवाल जाए चुईके ताकि हमरे अपन में आउर अधिक भरोसा नी रईख के उ परमेश्वर में भरोसा करबोई जे मोरालमान के भी फिर से जिलाए देवेला। १०हमार उ भयानक मृत्यु से ओहे बचाहे आउर हमार वर्तमान परिस्थिति में भी ओहे हमरे के बचाते रही। हमार आशरा उकरे में टिकाल आहे। ओहे हमरे के आगे भी बचाई। ११यदि तोहरे भी हमार ओर से प्रार्थना

कईकरे सहयोग देबा होले हमरे बहुत से आदमीमान केर प्रार्थनामान केर द्वारा परमेश्वर केर जे अनुग्रह मिले, उकार लाई बहुत से आदमीमान के हमार ओर से धन्यवाद देवेक केर कारण मिल जाई।

पौलुस केर योजनामान में परिवर्तन

११हमरे के ईकार गर्व आहे कि हमरे ई बात साफ मन से कहेक सकाथी कि हमरे ई जगत केर सागें आउर खासकईकरे के तोहरे मान केर सागें परमेश्वर केर अनुग्रह केर अनुसार व्यवहार कईरहे। हमरे उ सरलता आउर सच्चाई केर सागें व्यवहार कईरी जे परमेश्वर से मिलेला न कि दुनियादारी बुद्धि से। १३हाँ! ईकारे लागिन हमरे उसोउब के छोईड के तोहरे के बस आउर कोनो नी लिखाथी, जेकार से तोहरे हमरे के पूरा भाल से वैसानेहे समईझ लेबा। १४जैसान तोहरे हमरे के आंशिक रुप से समईझा। तोहरे हमार लागिन वैसानेहे गर्व कईर सकाला जैसान हमरे तोहरे केर लागिन उ दिन गर्व करबोई जेखान हमार प्रभु यीशु फिर आवी।

१५आउर येहे विश्वास केर कारण मोंग्र पहिले तोहरे ठिन आवेक केर लागिन ठाईन राहों ताकि तोहरे के दोबारा से आशीर्वाद केर लाभ मिल सकी। १६मोंग्र सोचोना कि मकिदुनिया जाएक समय तोहरे से मिलबों आउर जेखान मकिदुनिया से घुरबों होले फिर तोहार ठिन जाबों। आउर फिर, तोहरे केर द्वाराए यहूदिया केर लागिन विदा कराल जाबों। १७मोंग्र जेखान ई योजनामान बनाय राहों, होले मोके कोनो संशय नी राहे। या मोंग्र जे योजनामान बनाओना होले का उसोउब के सांसारिक ढंग से बनाओना कि एक हे समय “हाँ, हाँ” भी कहते रहबों आउर “ना, ना” भी करते रहबों।

१८परमेश्वर विश्वसनीय हेके आउर उ ईकार साक्षी देवी कि तोहरे केर प्रति हमार जे वचन आहे एके सागें “हाँ” आउर “ना” नी कहेला। १९काहेकि तोहरे केर बीच जे परमेश्वर केर बेटा यीशु मसीह के हमरे, यानी सिलवानुस, तिमुथियुस आउर मोंग्र प्रचार कईरी, उतु “हाँ” आउर “ना” दुनों एके सागें नैखे लेकिन उकार द्वारा एक चिरन्तन “हाँ” केर हे घोषणा कराल जाहे। २०काहेकि परमेश्वर जे अनन्त प्रतिज्ञामान कईर, उसोउब यीशु में सोउब कर

लागिन “हाँ” बईन जाएला। ईकार लाई हमरे उकार द्वारा भी जे “आमीन” कहिला, उउ परमेश्वर केर महिमा केर लाई होवेला। ११उ जे तोहरे के मसीह केर आदमी केर रूप में हमार सागें सुनिश्चित करेला आउर जेहार हमरे के भी अभिषिक्त कइर उ परमेश्वरे हेके। १२जेहार हमार ऊपरे अपन प्रभुत्व केर मुहर लगाहे आउर हमार भीतरे बयाना केर रूप में उ पवित्र आतमा देईहे जे ई बात केर आश्वासन हेके कि जे देवेक केर वचन उ हमरे के देवीहे, उके उ हमरे के देवी।

१३साक्षी केर रूप में परमेश्वर केर दुहाई देईके आउर अपन जीवन केर शपथ लेईके मोंयं कहाथों कि मोंयं दोबारा कुरिन्थुस ईकार लाई नी आय राहों कि मोंयं तोहरे के पीड़ा से बचाएक खोजात राहों। १४ईकार अर्थ ई न लगे कि हमरे तोहरे केर विश्वास में काबू पावेक चाहाथि। तोहरे तो अपन विश्वास में अडिग आहा। लेकिन बात ई हेके कि हमरे तो तोहरे केर खुशी केर लाई तोहरे केर सहकर्मी हेकि।

२ ईकरे लाई मोंयं ई निश्चय कइर लेई राहों कि तोहरे के फिर से दुःख देवेक तोहार टिन नी आबो कइके। १काहेकि यदि मोंयं तोहरे के दुःखी करबों होले फिर ऐसान के होई जे मोके सुखी करी? सिवाय तोहरे केर जेमान के मोंयं दुःख देईहों। २येहे बात तो मोंयं तोहरे के लिखों कि जेखान मोंयं तोहरे टिन आबों होले जेमान से मोके आनन्द मिलेक चाही, उमान केर द्वारा मोके दुःख न पहुँचाल जाओक। काहेकि तोहरे सोउब में मोर ई विश्वास आहे कि मोर खुशी में तोहरे सोउब भी खुशी होवा। ३काहेकि तोहरे के मोंयं दुःख भरा मन आउर वेदना केर सागें आईख पानी बहाए-बहाए के ईके लिखों। लेकिन तोहरे के दुःखी करेक केर लाई नई, लेकिन ईकार लाई कि तोहरे केर प्रति जे मोर प्रेम आहे, उउ कितना महान आहे, तोहरे ईके जाईन पाबा।

बुरा करेक वाला के क्षमा करा

४किन्तु यदि केहोहर मोके कोनो दुःख पहुँचाहॉए होले उउ मोके भईर नई, लेकिन कोनो न कोनो मात्रा में तोहरे सोउब केओ पहुँचाहॉए। ५ऐसान आदमी के तोहरे केर समुदाय जे दण्ड देईहॉए, ओतने पर्याप्त आहे। ६ईकार लाई तोहरे होले एखान उकार विपरीत उके क्षमा कइर देवा आउर उके प्रोत्साहित करा ताकि उ कहीं बढ़ाल चढ़ाल दुःख में डूईब न जाओक। ७ईकार लाई मोर तोहरे से विनती आहे कि तोहरे उकार प्रति अपन प्रेम के बढावा। ८ईके मोंयं तोहरे के ईके देखेक केर लाई लिखों

कि तोहरे परीक्षा में पूरा उतराला कि नई आउर सोउब बातमान में आज्ञाकारी रहबा या नई। ९किन्तु यदि तोहरे केखो कोनो बात केर लाई क्षमा कराथा होले उके मोंयं भी क्षमा कराथों आउर जे कुछ मोंयं क्षमा कइरों (यदि कोनो क्षमा कइरों), होले उ मसीह केर उपस्थिति में तोहरे केर लाई हे कइरों। १०ताकि हमरे शैतान से माउर नी खाएक होई। काहेकि उकार चालमान से हमरे अनजान नैखी।

पौलुस केर अशांति

११जेखान मसीह केर सुसमाचार केर प्रचार करेक केर लाई मोंयं त्रोवास आलों होले हुवाँ मोर लाई प्रभु केर द्वार खुला राहे। १२अपन भाई तितुस के हुवाँ नी पाए के मोर मन बहुत व्याकुल राहे। सेहसे उमान से विदाई लेईके मोंयं मकिदुनिया में चईल गेलों।

१३किन्तु परमेश्वर धन्य आहे जे मसीह केर द्वारा अपन विजय-अभियान में हमरे के सोभे समय रास्ता देखाएला। आउर हमार द्वारा हर कहीं अपन ज्ञान केर सुगंध फैलाएला। १४काहेकि उकार लाई, जेमान एखान उद्धार केर रास्ता में आहॉए आउर उमान केर लाई भी जेमान विनाश केर मार्ग में आहॉए, हमरे मसीह केर परमेश्वर के समर्पित मधुर भीनी सुगंधित धूप हेकि १५किन्तु उमान केर लाई जेमान विनाश केर मार्ग में आहॉए, ईउ मृत्यु केर ऐसान दुर्गन्ध हेके, जे मृत्यु केर ओर लेई जाएला। लेकिन उमान केर लाई जेमान उद्धार केर मार्ग में बढ़ाथाँए, ईउ जीवन केर ऐसान सुगंध हेके, जे जीवन केर ओर अग्रसर करेला। किन्तु ई काम केर लाई सुपात्र के हेके? १६परमेश्वर केर वचन के अपन लाभ केर लाई, उकार में मिलावट कइरके बेचेक वाला बहुत से दोसरा आदमीमान जैसान हमरे न लगी। नई! हमरे तो परमेश्वर केर सामने परमेश्वर केर ओर से भेजाल आदमीमान केर समान मसीह में स्थित होएके, सच्चाई केर सागें बोलिला।

नौतून प्रतिज्ञा केर सेवक

३ ईकार से का ऐसान लगाथे कि हमरे फिर से अपन प्रशंसा अपन से करेक लईगी? अथवा का हमरे तोहरे केर लाई या तोहरे से परिचयपत्र लेवेक केर आवश्यकता आहे? जैसान कि के केमान करेना। निश्चय नई, १हमार पत्र तो तोहरे स्वयं हेका जे हमार मन में लिखाल आहे, जेके सोभे कोई जानेना आउर पढ़ेना २आउर तोहरे भी तो ऐसानेहे देखावाल जैसान कि तोहरे

मसीह केर पत्र हेका। जे हमार सेवा केर परिणाम हेके। जेके स्याही से नई लेकिन सजीव परमेश्वर केर आतमा से लिखाल जाहे। जेके पथरीली शिलपाट्टा में^v नई लेकिन मनुष्य केर हृदय पटल में लिखाल जाहे।

हमरे मसीह केर कारण परमेश्वर केर सामने ऐसान दावा करेक केर भरोसा आहे।^५ऐसान नई कि हमरे अपन में ईतना समर्थ आहे जे सोचेक लईधी कि हमरे अपन से कोनो कईर सकिला लेकिन हमरे के सामर्थ्य तो परमेश्वर से मिलेला।^६ओहे हमरे के एक नौतून करार केर सेवक बनेक योग्य ठहरा हे। ई कोनो लिखित संहिता न लगे लेकिन आतमा केर नियम हेके काहेकि लिखित संहिता तो मोरेला जबकि आतमा जीवन देवेला।

नौतून नियम महान महिमा आनेला

किन्तु उ सेवा जे मृत्यु से युक्त राहे यानी व्यवस्था केर विधान जे पत्थरमान में अंकित कराल जाए राहे उकार में ईतना तेज राहे कि ईसाएल केर आदमीमान मूसा के उ तेजस्वी मुख के एके रकाम नी देखेक सकलाए। (आउर यद्यपि उकार उ तेज पिछे क्षीण होए गेलाक।) 'फिर आतमा से युक्त सेवा आउर अधिक तेजस्वी काहे नी होई।^९आउर फिर जेखान दोषी ठहराएक वाला सेवा में ईतना तेज आहे होले उ सेवा में कितना अधिक तेज होई जे धर्मा ठहराएक वाला सेवा हेके।^{१०}काहेकि जे पहिले तेज से परिपूर्ण राहे उ एखान उ तेज केर सामने जे उकार से कहीं अधिक तेजस्वी आहे, तेज रहित होए जाहे।^{११}काहेकि उ सेवा जेकार तेजहीन होए जाएक निश्चित राहे, उतु तेजस्वी राहे, होले जे नित्य आहे, उतु कितना तेजस्वी होई।

^{१२}अपन एहे आशारा केर कारण हमरे ईतना निर्भय आही।^{१३}हमरे उ मूसा केर जैसान नैखी जे अपन मुख में पर्दा डार्डले रहात राहे कहीं ईसाएल केर आदमीमान (यहूदी) अपन आईख गड़ाए के देखले जेमान केर विनाशा सुनिश्चित राहे, उ सेवा केर अंत के नी देखेक पाओक कईके।^{१४}किन्तु उमान केर बुद्धि बन्द होए जाए राहे, काहेकि आईज तक जेखान से उमान उ पुरना नियम के पढ़ेना, होले ओहे पर्दा उमान में बिना हटाए के पड़ाल रहेला। काहेकि उ पर्दा बस मसीह केर द्वारा हटाल जाएला।^{१५}आईज तक जेखान जेखान मूसा केर ग्रंथ पढ़ाल जाएला होले पढ़ेक वालामान केर मन में उ

पर्दा पड़ाले रहेला।^{१६}किन्तु जेखान केकरो हृदय प्रभु केर ओर मुड़ेला होले उ पर्दा हटाए देवाल जाएला।^{१७}देखा! जे प्रभु केर ओर मोंय इंगित कराथों, ओहे आतमा हेके। आउर जहाँ प्रभु केर आतमा आहे, हुवाँ छुटकारा आहे।^{१८}सेहेसे हमरे सोभे अपन खुला मुख केर साथे दर्पण में प्रभु केर तेज के जेखान ध्यान करिला होले हमरे के भी वैसानेहे होवेक लगेला आउर हमार तेज अधिकाधिक बदेक लगेला। ई तेज उ प्रभु से हे प्राप्त होवेला। यानी आतमा से।

माटी केर पात्रमान में अध्यात्म केर धन

४ काहेकि परमेश्वर केर अनुग्रह से ई सेवा हमरे के प्राप्त होहे, ईकार लाई हमरे निराशा नी होईला।^१हमरे होले लज्जापूर्ण गुप्त काममान के छोईइ देली। हमरे कपट नी करिला आउर न ही हमरे परमेश्वर केर वचन में मिलावट करिला, लेकिन सत्य के सरल रूप में प्रकट कईके आदमीमान केर मन में परमेश्वर केर सामने अपन के प्रशंसा केर योग्य ठहराएला।^२जे सुसमाचार केर हमरे प्रचार करिला, उकार में यदि केकरो लाई पर्दा पईडे होले ईटु केवल उमान केर लागिण पईडे, जेमान विनाशा केर रास्ता में चलाथाँए।^३ई युग केर स्वामी (शैतान) ई अविश्वासिमान केर बुद्धि के अंधरा कईर देईहे ताकि उमान परमेश्वर केर साक्षात प्रतिरूप मसीह केर महिमा केर सुसमाचार से फुटाल इंजोत के न देईख पाओक।^४हमरे स्वयं अपन प्रचार नी कराथी लेकिन प्रभु केर रूप में मसीह यीशु केर उपदेश देवाथि। आउर अपन बारे में तो येहे कहाथि कि हमरे यीशु केर नाते तोहरे केर सेवक हेकि।^५काहेकि ओहे परमेश्वर, जेहार कईह राहे, "अंधकार से हे इंजोत चमकी" ओहे हमार हृदय में प्रकाशित होहे, ताकि हमरे यीशु मसीह केर आदमीत्व में परमेश्वर केर महिमा केर ज्ञान केर ज्योति मिल सकी।

किन्तु हमरे जैसान माटी केर पात्रो में ई सम्पत्ति ईकार लाई रखाल जाही कि ई अलौकिक शक्ति हमार नई; लेकिन परमेश्वर केर सिद्ध होक।^६हमरे हर समय हर एक प्रकार से कठिन दबावमान में जीयाथि, किन्तु हमरे कुचलाल नी जाही। हमरे घबराय जाही किन्तु निराशा नी होही।^७हमरे के यातनामान देवाल जाएला किन्तु हमरे छोड़ाल नी जाही। हमरे के झुकाए देवाल जाहे, लेकिन नष्ट नी होही।^८हमरे सोभे समय अपन देह में यीशु केर मृत्यु केर हर कहीं लेईये रहिला। ताकि यीशु केर जीवन भी हमार देह में स्पष्ट रूप से प्रकट होक।^९यीशु केर कारण हमरे जीवितमान केर निरन्तर मौत के हाथ

^v ३:३ शिलपाट्टा में परमेश्वर सिनाई पर्वत में मूसा के जे व्यवस्था केर विधान देवी राहे उसोउब शिला पटलो में लिखाल राहे। देखाब निर्माणन २४:१२; २५:१६

में सौंपाए जाईला ताकि यीशु केर जीवन भी नाशवान शरीर में स्पष्ट रूप से उजागर होक। १?ईकरे से मृत्यु हमार में आउर जीवन तोहार में सक्रिय आहे।

१?शास्त्र में लिखाल आहे, “मोंग्रं विश्वास कईर राहों ईकार लाई मोंग्रं बोललों।” हमरे में भी विश्वास केर ओहे आतमा आहे आउर हमरे भी विश्वास करिला ईकार लाई हमरे भी बोलिला। १?काहेकि हमरे जानिला कि जेहार प्रभु यीशु के मोरालमान में से जिलाए के उठालक, उ हमरे के भी ओहे रकाम जीवित करी जैसान उ यीशु के जिलाय राहे। आउर हमरे भी तोहरे केर सागों अपन सामने खड़ा करी। १?ई सोउब बातमान तोहरे केर लाई कराल जाथे, ताकि अधिक से अधिक आदमीमान में फैलते जावाल परमेश्वर केर अनुग्रह, परमेश्वर के महिमा मण्डित करेक वाला आधिकाधिक धन्यवाद देवेक में प्रतिफलित होए सकी।

विश्वास से जीवत

१?ईकार लाई हमरे निराश नी होईला। यद्यपि हमार भौतिक शरीर क्षीण होते जाथे, होले भी हमार अंतरात्मा प्रतिदिन नौतून से नौतून होते जाथे। १?हमार पल भईर केर ई छोटो-मोटो दुःख एकठु अनन्त अतुलनीय महिमा पैदा कराथे। १?जे कुछ देखाल जाए सकेला, हमार आँईख उकरे में नी टिके, लेकिन अदृश्य में टिकाल आहे। काहेकि जे देखाल जाए सकेला, उसोउब विनाशी हेके, जबकि जेके नी देखाल जाए सकेला, उठु अविनाशी हेके।

५ १?काहेकि हमरे जानिला कि हमार ई काया अर्थात् ई तम्बू जेकार में हमरे ई धरती में रहिला गिराए देवाल जाई होले हमरे परमेश्वर केर ओर से सोरग में एकठु चिरस्थायी भवन मिल जाई जेठु मनुष्य केर हाथ से बनाल नी होई। १?सेहेसे हमरे जेखान तक ई आवास में आहे, हमरे कान्दते-मुन्दते रहिला आउर ईखे चाहते रहिला कि अपन सोरगीय भवन में जाए के राहबोई। १?निश्चय हमार ई धारणा आहे कि हमरे उके पाबोई आउर फिर बेघर नी रहबोई। १?हमार में से उमान जे ई तम्बू यानी भौतिक शरीर में स्थित आहाँए, बोझ से दबाए के कहराथाँए। कारण येहे हेके कि हमरे ई वस्त्रमान के त्यागेक नी खोजिला लेकिन उकरे हे ऊपरे उके धारण करेक खोजिला ताकि जे कुछ नाशवान हेके, उके अनन्त जीवन निगईल लेई। १?जेहार हमरे के ई प्रयोजन केर लाई तैयार कईर, उ परमेश्वरे हेके। ओहे ई आश्वासन केर रूप में कि अपन वचन केर अनुसार उ हमरे के देवी, बयाना केर रूप में हमरे के आतमा देई हे।

१?हमार पूरा विश्वास आहे, काहेकि हमरे जानिला कि जेखान तक हमरे अपन देह में रहाथि, प्रभु से दूर आही। १?काहेकि हमार विश्वास केर सहारे जीयाथि। बस आँईख केर देखाल केर सहारे नई। १?हमार विश्वास आहे, ईकरे से मोंग्रं कहाथों कि हमरे अपन देह के त्याईग के प्रभु केर सागों रहेक के अच्छा समझिला। १?ईकरे से हमार ई अभिलाषा आहे कि हमरे चाहे उपस्थित रहबोई आउर चाहे अनुपस्थित, उके अच्छा लगते रहोक। १?हमरे सोउब कोई अपन शरीर में स्थित रई के भला या बुरा, जे कुछ कईरी, उकार फल पावेक केर लाई मसीह केर न्यायासन केर सामने अवश्य उपस्थित होवेक होई।

परोपकारी परमेश्वर केर मित्र होवेना

१?ईकार लाई प्रभु से डराएके हमरे सच्चाई के ग्रहण करेक केर लाई आदमीमान के समझाते-बुझाते रहिला। हमार आउर परमेश्वर केर बीच कोनो पर्दा नैखे। आउर मोर आशरा आहे कि तोहरे भी हमरे के पूरा भाल से जानाला। १?हमरे तोहरे केर सामने फिर से अपन कोनो प्रशंसा नी कराथि। लेकिन तोहरे के एकठु अवसर देवाथि कि तोहरे हमार ऊपरे गर्व करेक सकबा। ताकि, जेमान प्रत्यक्ष दिखाई देवेक वाला वस्तु में गर्व करेना, न कि उकार में जे कुछ उमान केर मन में आहे, उमान के उसोउब केर उत्तर मिल सकोक। १?काहेकि यदि हमरे दीवाना हेकि होले परमेश्वर केर लाई हेकि आउर यदि सियाना हेकि होले उठु तोहरे केर लाई हेकि। १?हमार नियन्ता तो मसीह केर प्रेम हेके काहेकि हमरे अपन मन में ईके धाईर लेही कि उ एकझन आदमी (मसीह) सोउब आदमीमान केर लाई मोरलक। अतः सोभे मोईर गेलाँए। १?आउर उ सोउब आदमीमान केर लाई मोरलक काहेकि जेमान जीवित आहाँए, उमान एखान से आगे बस अपनहे लाई न जीयात रहोक, लेकिन उमान केर लाई जियोक जेमान मोरेक पिछे फिर जीवित कईर देवाल जाहे।

१?परिणामस्वरूप एखान से आगे हमरे कोनो भी आदमी के सांसारिक दृष्टि से नी देखबोई यद्यपि एक समय हमरे मसीह के भी सांसारिक दृष्टि से देखात राही। कुछ भी होक, एखान हमरे उके उ रकाम नी देखिला। १?ईकार लाई यदि केहो मसीह में स्थित आहाँए होले एखान उ परमेश्वर केर नौतून सृष्टि केर अंग हेकाँए। पुरना बातमान जाते आहे। सोउब कुछ नौतून होए जाहे १?आउर फिर ई सोउब बातमान उ परमेश्वर केर ओर से होवेला, जेहार हमरे के मसीह केर द्वारा अपन में मिलाए लेहे आउर आदमीमान के परमेश्वर से मिलाए केर

काम हमरे के सौँईपे। ^१हमार संदेश आहे कि परमेश्वर आदमीमान केर पापमान के अनदेखी कईरके मसीह केर द्वारा उमान के अपन में मिलाथे आउर ओहे मनुष्यमान के परमेश्वर से मिलाएक केर संदेश हमरे के सौँईपे। ^२ईकार लाई हमरे मसीह केर प्रतिनिधि केर रूप में काम कराथि। जैसान कि परमेश्वर हमार द्वारा तोहरे के चेताथे। मसीह केर ओर से हमरे तोहरे के विनती कराथि कि परमेश्वर केर सागें मिल जावा। ^३जेमान पाप रहित हेकाँए, उमान के उईकार लाई पाप-बली बनालक कि हमरे उकार द्वारा परमेश्वर केर सामने आच्छा ठहराय जाबोई।

६ ^१परमेश्वर केर काम में सागें-सागें काम करेक केर नाते हमरे तोहरे मान से आग्रह कराथि कि परमेश्वर केर जे अनुग्रह तोहरे के मिले, उके व्यर्थ न जाएक देआ। ^२काहेकि उ कईहे:

“मोंयं उचित समय में तोहरे केर सुईन लेहों,
आउर मोंयं उद्धार केर दिन तोहरे के सहारा
देवेक आलों।” यशायाह ४९:८

देखा! “उचित समय” येहे हेके। देखा! “उद्धार केर दिन” येहे हेके।

^३हमरे केकरो लाई कोनो विरोध उपस्थित नी कराथि जेकार से हमार काम में कोनो कमी होक। ^४लेकिन परमेश्वर केर सेवक केर रूप में हमरे सोभ रकाम से अपन के अच्छा सिद्ध करते रहिला। धीराज केर सागें सोउब कुछ के सहते यातनामान केर बीच, विपत्तिमान केर बीच, कठिनाईमान केर बीच “माउर खाते खाते, बन्दीगृहमान में रहते रहते, अशांति केर बीच, परिश्रम करते करते, राती-राती आँईख भी नी झपकाए के, भूखे रईह के ^५अपन पवित्रता, ज्ञान आउर धिराज से, अपन दयालुता, पवित्र आतमा केर वरदानमान आउर सच्चा प्रेम, ^६अपन सच्चा संदेश आउर परमेश्वर केर शक्ति से आच्छाई के अपन दायां-बायां हाथ में ढाल केर रूप में लेईके

^७हमरे आदर आउर निरादर केर बीच अपमान आउर सम्मान में अपन के उपस्थित करते रहिला। हमरे के ठकरा समझाए जाएला, यद्यपि हमरे सच्चा हेकि। ^८हमरे के अनाड़ी समझाल जाएला, जबकि हमरे सोभे के जानिला। हमरे के आधामोरा कईके सोचाल जाएला, लेकिन देखा हमरे तो जीवित आही। हमरे के दण्डित होआल सोचाएना, होले भी देखा हमरे के मृत्यु के नी सौँपाल जाहे। ^९हमरे के शोक से व्याकुल समझाल जाएला, जबकि हमरे तो सोभे समये खुशी से रहिला। हमरे के दीन-हीनमान केर रूप में

सोचेना, जबकि हमरे बहुतझन के वैभवशाली बनाथि। आदमीमान समझेना कि हमार टिन कोनो नेखे, जबकि हमार टिन तो सोउब कुछ आहे।

^{१०}हे कुरिन्थिमान, हमरे तोहार सागें पूरा भाल से खोईल के बातमान करलि। तोहरे केर लाई हमार मन खुला आहे। ^{११}हमार प्रेम तोहरे केर लाई कमती नी होहे। किन्तु तोहरे हमरे के प्यार करेक रोईक देईहा। ^{१२}तोहरे के अपन छौवा सोईच के मोंयं कहाथों कि बदला में अपन मन तोहरे भी हमार लाई पूरा भाल से खुला रखेक लगे।

हमरे परमेश्वर केर मन्दिर हेकि

^{१३}अविश्वासिमान केर सागें बेमेल संगति न करबा काहेकि आच्छाई आउर बुराई के भला कैसान समानता? या इंजोत आउर अंधार में भला मित्रता कैसान होवोक सकेला? ^{१४}ऐसानेहे मसीह केर शैतान से कैसान तालमेल? अथवा अविश्वासी केर सागें विश्वासी केर कैसान साझा? ^{१५}परमेश्वर केर मन्दिर केर मूर्तिमान से का नाता? काहेकि हमरे स्वयं उ सजीव परमेश्वर केर मन्दिर हेकि, जैसान कि परमेश्वर कई राहे:

“मोंयं उमान में निवास करबों; चलबों फिरबों,
मोंयं उमान केर परमेश्वर होबों आउर उमान मोर
आदमी बनबाँए।” लैव्यव्यवस्था २६:११-१२

^{१६}“ईकार लाई तोहरे उमान में से बाहिरे आए जावा,
उमान से अपन के अलग करा,
एखान तोहरे कभी कोनो भी न छूवा जे अशुद्ध हेके
सेखान मोंयं तोहरे के अपनाबाँ।”

यशायाह ५२:११

^{१७}“आउर मोंयं तोहरे केर पिता बनबों,
तोहरे मोर बेटा आउर बेटा होवा, सर्वशक्तिमान
प्रभु येहे कहेला।” २ शमूएल ७:८, १४

७ ^१हे प्रिय सागींमान, काहेकि हमार टिन ईसोउब प्रतिज्ञा आहे। ईकार लाई आवा, परमेश्वर के प्रति श्रद्धा केर कारण हमरे अपन पवित्रता के परिपूर्ण कईरके अपन बाहरी आउर भीतरी सोभे दोषमान के धोए देबोई।

पौलुस केर आनन्द

^२अपन मन में हमरे के जगह देवा। हमरे केकरो भी कोनो नी बिगाड़ाही। हमरे केखो भी टेस नी पहुँचाही। हमरे

केकरोँ सागें नी ठाईकी। १मोंयं तोहरे के नीचा देखाएक केर लाई ऐसान नी कहाथों काहेकि मोंयं तोहरे के बताए चुईकोँ कि तोहरे तो हमार मन में बसाल आहा। हियाँ तक कि हमरे तोहरे केर सागें मौरक केर या जीएक केर लाई भी तैयार आही। १मोंयं तोहरे में भरोसा करीना। तोहार ऊपरे मोर बड़ा गर्व आहे। मोंयं सुख चैन से आहों। अपन सोभे यातनामान झईलके भी मोर में आनन्द उमड़ते रहेला।

१जेखान हमरे मकिदुनिया आय राही सेखान भी हमरे के आराम नी मिल राहे, लेकिन हमरे के तो हर प्रकार केर दुःख उठाएक होए राहे बाहिरे झगड़ामान से आउर मन केर भीतरे डर से। १किन्तु दीन दुखिमान के सुखी करेक वाला परमेश्वर तितुस के हियाँ पहुँचाए के हमरे के सान्त्वना देहे। १आउर उ भी केवल उकार, हियाँ पहुँचेक से नई लेकिन ईकार से हमरे के आउर अधिक सान्त्वना मिललक कि तोहरे उके कितना सुख देई राहा। उ हमरे के बतालक कि हमार सागें मिलेक केर लाई तोहरे कितना व्याकुल आहा। तोहरे हमार कितना चिंता कराला। ईकार से हमरे आउर भी खुशी होली।

१यद्यपि अपन चिंता से मोंयं तोहरे के दुख पहुँचाहों किन्तु फिर भी मोके उसोउब के लिखेक केर खेद नैखे। चाहे पहिले मोके ईकार दुख होए राहे किन्तु एखान मोंयं देखाथों कि उ चिंती से तोहरे के बस थोड़ा समय केर लाई हे दुःख पहुँईच राहे। १सेहेसे एखान मोंयं खुशी आहों। ईकार लाई नई कि तोहरे के दुःख पहुँईच राहे लेकिन ईकार लाई कि उ दुःख केर कारण हे तोहरे पछतावा करला। तोहरे के उ दुःख परमेश्वर केर ओर से हे होए राहे ताकि तोहरे के हमार कारण कोनो हानि न पहुँईच पाओक। १काहेकि उ दुःख जेके परमेश्वर देवेला एकटु ऐसान मनफिराव केर जन्म देवेला जेकार लाई पछताएक नी पड़ेला आउर जे मुक्ति दिलाएला। किन्तु उ दुःख जे सांसारिक होवेला, उकार से तो बस मृत्यु जन्म लेवेला। १देखा। ई दुःख जेके परमेश्वर देईहे, उ तोहार में कितना उत्साह जगाए देईहे, अपन भोलापन केर कितना प्रतिरक्षा, कितना आक्रोश, कितना आकुलता, हमार से मिलेक केर कितना बेचैनी, कितना साहस, पापी केर प्रति न्याय चुकाएक केर कैसान भावना पैदा कईर दी हे। तोहरे हर बात में ईके देखाए देईहा कि ई बारे में तोहरे कितना निर्दोष राहा। १सेहेसे यदि मोंयं तोहरे के लिख राहों होले उ आदमी केर कारण नई जे अपराधी राहे आउर न ही उकार कारण जेकार प्रति अपराध कराल जाए राहे। लेकिन ईकार लाई लिख राहों कि परमेश्वर केर

सामने हमार प्रति तोहरे केर चिंता केर तोहरे के ज्ञान होए जाओक। १ईकार से हमरे के प्रोत्साहन मिले।

हमार ई प्रोत्साहन केर अतिरिक्त तितुस केर आनन्द से हमरे आउर अधिक आनन्दित होली, काहेकि तोहरे सोउब केर कारण उकार आतमा के चैन मिलेह। १तोहरे केर लाई मोंयं उकार से जे बईद चईद के बात कईर राहों, उकार लाई मोके लजाएक नी होलाक। लेकिन हमरे जैसान तोहरे के सोउब कुछ सच-सच कईह राही, वैसानेहे तोहरे केर बारे में हमार गर्व तितुस केर सामने सच्चाई सिद्ध होहे। १उ जेखान ईके याईद करेला कि तोहरे सोउब कोई कैसान उकार आज्ञा मानला आउर डर से थरथर काँपते काँपते तोहरे कैसान उके अपनाला होले तोहरे केर प्रति उकार प्रेम आउर भी बईद जाएला। १मोंयं खुश आहों कि मोंयं तोहार में पूरा भरोसा रखेक सकोना।

हमार दान

१देखा, हे भाईमान, एखान हमरे ईके चाहाथि कि तोहरे परमेश्वर केर उ अनुग्रह केर बारे में जाना जे मकिदुनिया क्षेत्र केर कलीसियामान में कराल जाहे। १मोर अभिप्राय ई हेके कि यद्यपि उमान केर कठिन परीक्षा लेवाल गेलाक होले भी उमान खुश रहाँए आउर अपन बड़ी दरिद्रता केर में रई के भी उमान केर सम्पूर्ण उदारता उमईड गेलाक। १मोंयं प्रमाणित कराथों कि उमान जितना देई सकात रहाँए देलाँए। ईतनाए नई लेकिन अपन सामर्थ्य से भी अधिक मन भईर के देलाँए। १उमान बड़ा आग्रह केर साथ संत जनमान केर सहायता करेक में हमरे के सहयोग देवेक केर लाई विनय करते रहाँए। १उमान से जैसान हमार आशारा राहे, वैसान नई लेकिन पहिले अपन के प्रभु के समर्पित करलाँए आउर फिर परमेश्वर केर ईच्छा केर अनुकूल उमान हमार में अर्पित होए गेलाँए। १ईकार लाई हमरे तितुस से प्रार्थना करलि कि जैसान उ अपन काम केर प्रारम्भ कईर चुईके, वैसानेहे ई अनुग्रह केर काम के उ तोहरे केर लाई करोक। १आउर जैसान कि तोहरे हर बात में यानी विश्वास में, वाणी में, ज्ञान में, अनेक प्रकार से उपकार करेक में आउर हमरे तोहरे के जे प्रेम केर शिक्षा देईही उ प्रेम में, भरपूर आहा, वैसानेहे अनुग्रह केर ई काम में भी भरपूर होए जावा।

१ईसोउब के मोंयं आज्ञा केर रूप में नी कहाथों लेकिन अन्य आदमीमान केर मन में तोहरे केर लाई जे तीव्रता आहे, उ प्रेम केर सच्चाई के प्रमाणित करेक केर लाई ऐसान कहाथों। १काहेकि हमार प्रभु यीशु मसीह केर अनुग्रह से तोहरे परिचित आहा। तोहरे ईके जानाला कि

धनी होएके भी तोहरे केर लाई उ निर्धन बईन गेलाक। ताकि उकार निर्धनता से तोहरे मालामाल होए जावा।

१०ई विषय में मोंयं तोहरे के अपन सलाह देवाथों। तोहरे के येहे शोभा देवेला। तोहरे पिछले साल न केवल दान देवेक केर ईच्छा में सोउबसे आगे राहा लेकिन दान देवेक में भी सोउबसे आगे रहा। ११एखान दान करेक केर उ तीव्र ईच्छा के तोहरे जे कुछ तोहार ठिन आहे, उकरे से पूरा करा। तोहरे ईके उतने ही लगन से “पूरा करा” जितना लगन से तोहरे ईके “चाईह” रहा। १२काहेकि यदि दान देवेक केर लगन आहे होले आदमी केर ठिन जे कुछ आहे, उकरे अनुसार उकार दान ग्रहण करेक केर योग्य बनेला, न कि उकार अनुसार जे उकार ठिन नेखे। १३हमरे ईके नी चाहिला कि दोसरामान के होले सुख मिलोक आउर तोहरे के कष्ट; लेकिन हमरे तो बराबरी चाहिला। १४हमार ईच्छा आहे कि उमान के ई अभाव केर समय में तोहरे केर सम्पन्नता उमान केर आवश्यकतामान के पूरा करोक ताकि आवश्यकता पड़ेक केर आगे चईल के उमान केर सम्पन्नता भी तोहरे केर अभाव के दूर करेक सकी ताकि समानता स्थापित होक। १५जैसान कि शास्त्र कहेला:

“जेहार बहुत बटोरलक उकार ठिन अधिक नी रहलक;
आउर जेहार थोड़ा बटोरलक, उकार ठिन कमती नी रहलक।” *निर्गमन १६:१८*

तितुस आउर उकार साथी

१६परमेश्वर केर धन्यवाद होक जेहार तितुस केर मन में तोहरे केर सहायता केर लाई वैसानेहे तीव्र ईच्छा भईर देईहे, जैसान हमार मन में आहे। १७काहेकि उ हमार प्रार्थना स्वीकार करलक आउर उ उकार लागिन विशेष रूप से अपन ईच्छा भी रखेला, ईकार लाई उ स्वयं अपन ईच्छा से हे तोहार ठिन जाएक केर लाई विदा होवाथे। १८हमरे उकार सागें उ भाई के भी भेजाथि, जेकार सुसमाचार केर प्रचार केर रूप में सोभे कलीसियामान में हर कहीं यश फैल जाथे। १९ईकार अतिरिक्त ई दयापूर्ण काम में कलीसियामान उके हमार सागें यात्रा करेक केर लाई नियुक्त भी कईराँए। ई दया काम जेकार प्रबन्ध हमार द्वारा कराल जाथे, स्वयं प्रभु के सम्मानित करेक केर लाई आउर परोपकार में हमार तत्परता के देखाएक केर लाई हेके।

२०हमरे सावधान रहेक केर चेष्टा कराथि ई बड़ा धन केर लाई जेकार प्रबन्ध कराथि, केहो हमार आलोचना न करोक। २१काहेकि हमरे केर अपन अच्छा साख बनाए

रखेक केर चिंता आहे। न केवल प्रभु के आगे, लेकिन आदमीमान केर बीच भी।

२२आउर उकार सागें हमरे अपन उ भाई के भी भेजाथि, जेके बहुत से विषय में आउर बहुत से अवसरमान में हमरे परोपकार केर लाई उत्सुक आदमी केर रूप में प्रमाणित कईरी। आउर एखान तो तोहरे केर लाई उकार में जे असीम विश्वास आहे, उकार से उकार में सहायता करेक केर उत्साह आउर अधिक होए जाहे।

२३जहाँ तक तितुस केर क्षेत्र आहे, तो उ तोहरे केर बीच सहायता काम में मोर साथी आउर सागें सागें काम करेक वाला हेके। आउर जहाँ तक हमार भाईमान केर प्रश्न आहे, उ तो कलीसियामान केर प्रतिनिधि तथा मसीह केर सम्मान हेके। २४सेहेसे तोहरे उके अपन प्रेम केर प्रमाण देबा आउर तोहरे केर लाई हमरे ईतना गर्व काहे कराथि, ईके सिद्ध करबा ताकि सोभे कलीसिया उके देखेक पारोक।

साथिमान केर मदद करा

१ एखान पवित्र जनमान केर सेवा केर विषय में, तोहरे के ई रकाम लिखते रहेक मोर लाई आवश्यक नैखे। २काहेकि सहायता केर लाई तोहरे केर तत्परता के मोंयं जानोना आउर उकार लाई मक़िदुनिया निवासिमान केर सामने ईके कईके मोके गर्व आहे कि अखाया केर आदमीमान तो, पिछले साल से ही तैयार आहाँए आउर तोहरे केर उत्साह उमान में से अधिकतर मान के काम कारेक लाई प्रेरणा देईहे। ३किन्तु मोंयं भाईमान के तोहरे ठिन ईकार लाई भेजाथों कि तोहरे के लेईके हमरे जे गर्व कराथि, उटु ई बारे में व्यर्थ सिद्ध न होक। आउर ईकार लाई भी कि तोहरे तैयार रहबा, जैसान कि मोंयं कहते आहाँ। ४नी होले जेखान केहों मक़िदुनिया वासी मोर सागें तोहार ठिन आबाँए आउर तोहरे के तैयार नी पाबाँए होले हमरे उ विश्वास केर कारण जेसोउब के हमरे तोहरे केर प्रति दर्शाए रही, लज्जित होबोई। आउर तोहरे तो आउर भी अधिक लज्जित होबा। ५ईकार लाई मोंयं भाईमान के ईके कहेक आवश्यक समझलों कि उमान हमार से पहिलेहे तोहरे ठिन जाओक आउर जेसोउब उपहारमान के देवेक केर तोहरे पहिलेहे वचन देई चुईका उमान के पहिले हे से उदारतापूर्वक तैयार रखोक। ईकार लाई ई दान स्वेच्छापूर्वक तैयार रखाल जाओक न कि दबाव केर साथ तोहरे से छीनाल कोनो वस्तु केर रूप में।

६ईके याईद रखबा: जे थोड़ा बुनेला, उ थोड़ाए काटी आउर जेकार बुनाई अधिक आहे, उ अधिके काटी।

७हर एकझन बिना कोनो कष्ट से या बिना कोनो दबाव से, उतना हे देओक जितना उकार मन में सोईचे। काहेकि परमेश्वर खुशी से-देवेक वालामान से हे प्रेम करेला। “आउ परमेश्वर तोहरे ऊपरे हर प्रकार केर उत्तम वरदानमान केर वर्षा करेक सकेला जेकार से तोहरे अपन आवश्यकता केर सोभे वस्तुमान में सोभे समय खुशी होवेक सकबा आउ सोभे अच्छा काममान केर लाई फिर तोहरे टिन आवश्यकता से भी अधिक रही। १जैसान कि शास्त्र में लिखाल आहे:

“उ मुक्त भाव से दीन जनमान के देवेला,
आउ उमान केर चिर उदारता सोभे-समय केर
लाई बनाल रहेला।” भजन संहिता ११२:९

१०उ परमेश्वरे बुनेक वाला के बीज आउ खाएक वाला के भोजन सुलभ करुवाएला। हुवाँ तोहरे के बीज देवी आउ उकार बढ़ओती करी, उकरे से तोहरे केर धर्म केर खेती फूली फली। ११तोहरे हर प्रकार से सम्पन्न बनल जावा ताकि तोहरे हर अवसर में उदार बईन सका। तोहरे केर उदारता परमेश्वर केर प्रति आदमीमान के धन्यवाद केर पैदा करी।

१२दान केर ई पवित्र सेवा से न केवल पवित्र आदमीमान केर आवश्यकतामान पूरा होवेला लेकिन परमेश्वर केर प्रति अत्यधिक धन्यवाद केर भाव भी उपजाएला। १३काहेकि तोहरे केर ई सेवा से जे प्रमाण प्रकट होवाथे, उकार से संत जनमान परमेश्वर केर स्तुति करबाँए। काहेकि यीशु मसीह केर सुसमाचार में तोहरे केर विश्वास केर घोषणा से उत्पन्न होवाल तोहरे केर आज्ञाकारिता केर कारण आउ अपन उदारता केर कारण उमान केर लाई तथा दोसरे सोभे आदमीमान केर लाई तोहरे दान देवाला। १४आउ उमान भी तोहरे केर लाई प्रार्थना करते करते तोहरे से मिलेक केर तीव्र ईच्छा करबाँए। तोहार ऊपरे परमेश्वर केर असीम अनुग्रह केर कारण १५उ वरदान केर लाई जेकार बखान नी करेक जाए सकाएला, परमेश्वर के धन्यवाद होक।

पौलुस केर द्वारा अपन सेवा के समर्थन

१० मोंय, पौलुस, निजी तौर से मसीह केर कोमलता आउ सहनशीलता केर साक्षी कईके तोहरे से निवेदन कराथों। आदमीमान के कहेक आहे कि मोंय जे तोहरे केर बीच रई के विनप्र आहों किन्तु ओहे मोंय जेखान तोहरे केर बीच नैखों, होले तोहरे केर लाई

निर्भय आहों। १एखान मोर तोहरे से प्रार्थना आहे कि जेखान मोंय तोहरे केर बीच रहबों होले ओहे विश्वास केर सागें वैसानेहे निर्भयता देखाएक केर लाई मोर ऊपरे दबाव न डालबा जैसान कि मोर विचार में मोके कोनो उ आदमीमान केर विरुद्ध देखाएक होई जेमान सोचेना कि हमरे एक संसारी जीवन जीईला। २काहेकि यद्यपि हमरे भी ई संसार में ही रहिला किन्तु हमरे संसारी आदमीमान केर रकाम नी लडिला। ३काहेकि जे शास्त्रमान से हमरे युद्ध लडिला, उसोउब सांसारिक न लगे, लेकिन उसोउब में गढमान के तहस-नहस कईर देवाक केर लाई परमेश्वर केर शक्ति निहित आहे। ४आउ ओहे शास्त्रमान से हमरे आदमीमान के तर्क केर आउ उ प्रत्येक अवरोध केर, जे परमेश्वर केर ज्ञान केर विरुद्ध खड़ा आहे, खण्डन करिला। ५जेखान तोहार में पुरा आज्ञाकारिता आहे होले हमरे हर प्रकार केर अनाज्ञा के दण्ड देवेक केर लाई तैयार आही।

६तोहरे केर सामने जेसोउब तथ्य आहे उसोउब के देखा। यदि कोनो अपन मन में ईके मानेना कि उसोउब मसीह केर हेके, होले उ अपन बारे में फिर से याईद करोक कि उ भी उतनाए मसीह केर हेके जितना कि हमरे हेकि। ७आउ यदि मोंय अपन उ अधिकार केर विषय में कोनो आउ गर्व करबों, जेके प्रभु हमार में तोहरे केर विनाश केर लाई नई लेकिन आध्यात्मिक निर्माण केर लाई देईहे। ८होले ईकार लाई मोंय लज्जित नी होबों। मोंय अपन ऊपरे नियंत्रण रखबों कि अपन चिठ्ठीमान केर द्वारा तोहरे के भयभीत करेक वाला केर रूप में नी लिखबों। ९मोर विरोधिमान केर कहेक आहे, “पौलुस केर चिठ्ठीमान तो भारी भरकम आउ प्रभावपूर्ण होवेला। किन्तु मोर आदमीत्व दुर्बल आउ वाणी अर्थहीन हेके।” १०किन्तु ऐसान कहेक वाला आदमी के समईझ लेवेक लगी कि तोहरे केर बीच नी रई केओ जेखान हमरे अपन चिठ्ठी में कोनो लिखिला होले उमान में आउ तोहरे केर बीच रई केहो हमरे जे कर्म करिला होले उमान में कोनो अन्तर नैखे।

११हमरे उ कईझन आदमीमान केर सागें अपन तुलना करेक केर साहस नी करिला जेमान अपन बहुत महत्वपूर्ण सोचेना। किन्तु जेखान उमान अपन के एक दोसरा से नापेना आउ परस्पर अपन तुलना करेना होले उमान येहे दर्शाएना कि उमान नी जानेना कि उमान कितना मूर्ख हेकाँए।

१३जे भी होक, हमरे उचित सीमामान से बाहिर बईद चईद के बात नी करबोई, लेकिन परमेश्वर हमार गतिविधिमान केर जे सीमामान के हमरे के सौँपे, हमरे उकरे में रहिला आउ उसोउब सीमामान तोहरे तक

पहुँचेला। १५ हमरे अपन सीमा केर उल्लंघन नी कराथि, जैसान कि यदि हमरे तोहरे तक नी पहुँईच पाथि होले जाताक। किन्तु तोहरे तक यीशु मसीह केर सुसमाचार के लेईके हमरे तोहरे टिन सोउबसे पहिले पहुँचि। १६ अपन उचित सीमा से बाहिरि जाएके कोनो दोसरा आदमी केर काम में हमरे गर्व नी करिला किन्तु हमार आशरा आहे कि तोहरे केर विश्वास जैसान जैसान बढ़ी होले वैसान वैसानेहे हमार गतिविधिमान केर क्षेत्र केर सागें तोहरे केर बीच हमरे भी व्यापक रूप से फैल जाबोई। १७ ईकार से तोहरे केर क्षेत्र से आगे भी हमरे सुसमाचार केर प्रचार करेक पावोई। कोनो अन्य के जे काम सौंपाल जाए राहे उ क्षेत्र में एखान तक जे काम होए चुईके हमरे उकार लाई नी बघारथि। १८ जैसान कि शास्त्र कहला: “जेकार से गर्व करेक आहे उ, प्रभु जे कुछ कइरहे, उकारे ऊपरे गर्व करबोई।” १९ काहेकि अच्छा उखे मानाल जाएला जेके प्रभु अच्छा स्वीकार करेला, न कि उ जे अपन के स्वयं अच्छा समझेला।

बनावटी प्रेरित आउर पौलुस

११ १काश, तोहरे मोर थोड़ा कुन मूर्खता सहन कइर लेता। हाँ, तोहरे उके सहन कइर लेवा। २काहेकि मोंयं तोहरे केर लाई ऐसान सजगता केर सागें, जे परमेश्वर से मिलेला, सजग आहों। मोंयं तोहरे के मसीह से सगाई कराए देईहों ताकि तोहरे के एकझन पवित्र कन्या केर समान उके अर्पित करेक पारबो। ३किन्तु मोंयं डराथों कि कहीं जैसान उ सांप हव्वा के अपन कपट से भ्रष्ट कइर देई राहे, वैसानेहे कहीं तोहरे केर मन भी उ एकनिष्ठ भक्ति आउर पवित्रता से, जे हमरे मसीह केर प्रति रखेक लगे, भटकाए न देवाल जाओक। ४काहेकि जेखान केहो तोहरे टिन आएके जे यीशु केर उपदेश हमरे तोहरे के देईही, उके छोईड के कोनो दोसरे यीशु केर तोहरे के उपदेश देवाँए, अथवा जे आतमा तोहरे ग्रहण कइरा, उकार से अलग कोनो आउर आतमा के तोहरे ग्रहण करवा अथवा छुटकारा केर जे संदेश के तोहरे ग्रहण कइरा, उकार से भिन्न कोनो दोसरा संदेश के भी ग्रहण कइरा।

५होले तोहरे बहुत खुश होवाला। लेकिन मोंयं अपन के तोहरे केर उ “बड़ा प्रेरितमान” से बिल्कुल भी छोटी नी सोचोना। ६होए सकेला मोर बोलेक केर शक्ति सीमित आहे किन्तु मोर ज्ञान तो असीम आहे। ई बात के हमरे सोभे बातमान में तोहरे के स्पष्ट रूप से दर्शाए देईही।

७आउर फिर मोंयं मुफ्त में सुसमाचार केर उपदेश देवीके तोहरे के ऊँचा उठाएक केर लाई अपन के झुकाए के, का कोनो पाप करलें कि? ८मोंयं दोसरा कलीसियामान से अपन पारिश्रमिक लेईके उमान के लूईठों ताकि मोंयं तोहरे केर सेवा करेक सकबों। ९आउर जेखान मोंयं तोहरे केर सागें राहों सेखान भी आवश्यकता होवेक समय मोंयं केकरो ऊपरे बोझ नी डाललें काहेकि मकिदुनिया से आवाल भाईमान मोर आवश्यकतामान के पूरा कइर देवी रहाँए। मोंयं हर बात में अपन के तोहरे केर ऊपरे न बोझ बनेक देहों आउर न बनेक देबों। १०आउर काहेकि मोर में मसीह केर सच्चाई निवास करेला, ईकार लाई अखाया केर समूचा क्षेत्र में मोके बईद चईदके बोलेक से केहो नी रोईक सकेना। ११भला काहे? का ईकार लाई कि मोंयं तोहरे के प्यार नी करोना? परमेश्वर जानेला, मोंयं तोहरे के प्यार करोना।

१२किन्तु जेसोउब के मोंयं करारथों उके होले करतेहे रहबों; ताकि उ तथाकथित प्रेरितमान केर गर्व के, जे गर्व करेक केर कोनो ऐसान बहाना खोजेना जेकार से उमान भी उसोउब काममान में हमार बराबर समझाल जाओक जेमान केर उसोउब के गर्व आहे; मोंयं उमान केर उ गर्व के समाप्त करेक सकबों। १३ऐसान आदमीमान नकली प्रेरित हेकाँए। उमान ठकरा हेकाँए, उमान मसीह केर प्रेरित होवेक केर ढोंग करेना। १४ईकार में कोनो अचरज नैखे, काहेकि शैतान भी तो परमेश्वर केर दूत केर रूप धारण कइर लेवेला। १५ईकार लाई यदि उकार सेवक भी आच्छा सेवकमान केर जैसान रूप धरण कइर लेबाँए होले ईकार में का बड़का बात हेके? किन्तु अंत में उमान के अपन करनी केर अनुसार फल तो मिलबे घारी।

पौलुस केर यातनामान

१६मोंयं फिर से दोहराथों कि मोके केहो मूर्ख न समझोक। किन्तु यदि फिर भी तोहरे ऐसाने समझाथा होले तो मोके मूर्ख बनाएके स्वीकार करा। ताकि मोंयं भी थोड़ा गर्व करेक पारबों। १७एखान ई जे मोंयं कहाथों, उसोउब प्रभु केर अनुसार नी करारथों लेकिन एकझन मूर्ख केर रूप में गर्वपूर्ण विश्वास केर सागें कहाथों। १८काहेकि बहुत से आदमीमान अपन सांसारिक जीवन में हे गर्व करेना। १९फिर तो मोंयं भी गर्व करबों। आउर फिर तोहरे तो ईतना समझदार आहा कि मूरखमान केर बातमान के खुशी केर साथ सहन कइर लेवाला। २०काहेकि यदि केहो तोहरे के दस बनाबाँए, तोहरे के शोषण करबाँए, तोहरे के कोनो जाल में फँसाबाँए, अपन के तोहरे से बड़ा

बनाबाँए अथवा तोहरे केर मुँख में थपड़ मारबाँए होले तोहरे उसोउब के सहन कईर लेवाला। ११मॉय लज्जाए के कहाथों, हमरे बहुत दुर्बल आही।

यदि कोनो आदमी कोनो वस्तु में गर्व करेक केर साहस करेला होले वैसानेहे साहस मॉय भी करबों। (मॉय मूर्खतापूर्वक कहाथों) १२ईब्रानी उमान एकला तो न लगाँए। मॉय भी हेकों। ईसाएली उमान एकला तो न लगाँए। मॉय भी हेकों। ईब्रानी उमान एकला तो न लगाँए। मॉय भी हेकों। १३का उमान एकला मसीह केर सेवक हेकाँए? (एकइन बुद्धिमान केर रकाम मॉय ईके कहाथों) कि मॉय तो उकार से भी बड़का मसीह केर दास हेकों। मॉय बहुत कठोर परिश्रम कईरों। मॉय बार बार जेल गेलों। मोके बार बार पीटाए जाहे। अनेक अवसरमान में मोर मृत्यु से सामना होलाक।

१४पाँच बार मॉय यहूदीमान से एक कम चालीस चालीस कोड़ा खालों। १५मॉय तीन-तीन बार लाठिमान से पीटाल जाहों। एक बार तो मोर ऊपरे पथरावा भी कराल गेलाक। तीन बार मोर जहाज डूबलक। एक दिन आउर एक राईत मॉय समुद्र केर गहरा पानी में बितालों। १६मॉय भयानक नदिमान, खूँखार डाकुमान से स्वयं अपन आदमीमान से, अधमीमान, नगरमान, गावँमान, समुद्रमान आउर दिखावटी भाईमान केर संकटमान केर बीच अनेक यात्रा कईरों।

१७मॉय कड़ा परिश्रम कईरके थकावट से चूर होए के जीवन जिहों। अनेक अवसरमान में मॉय सुतेके तक नी पालों। भूखे आउर प्यासे रहों। प्रायः मोके खाएक लाई नी मिलात राहे। बिना कपड़ा केर ठण्डा में ठिठुरात रहों।

१८आउर एखान आउर अधिक का कहबों? मोर ऊपरे सोभे कलीसियामान केर चिंता केर भार भी प्रतिदिन बनाल रहात रहे। १९केकरों दुर्बलता मोके शक्तिहीन नी कईर देवेला आउर केकार पाप में फँसेक से मॉय बेचैन नी होओना?

२०यदि मोके बद्दाए चद्दाएके बात करेक होई होले मॉय उसोउब बातमान के करबों जेसोउब मोर दुर्बलता केर हेके। २१परमेश्वर आउर प्रभु यीशु केर परमपिता जे सोभे समय धन्य हेके, जानेला कि मॉय कोनो झूठ नी बोलाथों। २२जेखान मॉय दमिश्क में राहों होले महाराजा अरितास केर राज्यपाल दमिश्क में घेरा डाईल के मोके बंदी कईर लेवेक केर जतन कईर राहे। २३किन्तु मोके नगर केर चाईर दीवार केर खिड़की से टोकरी में बैठाए के नीचे उतराए देवाल गेलाक आउर मॉय उकार हाथ से बईच निकाललों।

पौलस में प्रभु केर विशेष अनुग्रह

१२ एखान तो मोके गर्व करेके होई। ईकार से कोनो मिलेक वाला नैखे। किन्तु मॉय तो प्रभु केर दर्शनमान आउर प्रभु केर दैवी संदेशमान में गर्व करते रहबों। १मॉय मसीह में स्थित एकइन ऐसान आदमी के जानोना जेके चौदह साल पहिले (मॉय नी जानोना बस परमेश्वरे जानेला) देह सहित या देह रहित तीसरा सोरग में उठाए लेवाल जाए राहे। २आउर मॉय जानोना कि ई आदमी के (मॉय नी जानोना, बस परमेश्वरे जानेला) बिना शरीर केर या शरीर सहित श्शोरगलोक में उठाए लेवाल जाए राहे। आउर उ ऐसान शब्द सुईन राहे जेठु वर्णन से बाहिर आहे आउर जेके बोलेक केर अनुमति मनुष्य के नैखे। ५हाँ, ऐसान मनुष्य में मॉय अभिमान करबों किन्तु स्वयं अपन में, अपन दुर्बलतामान के छोईडके अभिमान नी करबों।

६काहेकि यदि मॉय अभिमान करेक लाई सोचबों होले भी मॉय मूर्ख नी बनबों काहेकि सेखान मॉय सच्चाई कहात रहबों। किन्तु तोहरे के मॉय ईकार से बचाथों ताकि केहो मोके जैसान करेक देखेला या कहेक सुनेला, उकार से अधिक श्रेय न देओक।

७असाधारण दैवी संदेशमान केर कारण मोर कोनो गर्व न होए जाओक ईकार लाई एकठु काँटा मोर देह में चुभाल जाहे। जेठु शैतान केर दूत हेके, उ मोके दुखुनाते रहेला ताकि मोर बहुत अधिक घमण्ड न होए जाओक। ८काँटा केर ई समस्या केर बारे में मॉय प्रभु से तीन बार प्रार्थना कईरों कि उ ई काँटा के मोर में से निकलाए लेओक, ९किन्तु उ मोके कई देईहे, “तोर लाई मोर अनुग्रह पर्याप्त आहे काहेकि निर्बलता में हे मोर शक्ति सोउबसे अधिक होवेला” ईकार लाई मॉय अपन निर्बलता में खुशी केर साथ गर्व करबों। ताकि मसीह केर शक्ति मोर में रहोक। १०ई रकाम मसीह केर ओर से मॉय अपन निर्बलतामान में, अपमानमान में, कठिनाईमान में, यातनामान आउर बाधामान में आनन्द लेओना काहेकि जेखान मॉय निर्बल होए जाओना, सेखाने शक्तिशाली होओना।

कुरिन्थिमान केर प्रति पौलस केर प्रेम

१मॉय मूर्खमान केर जैसान बतियाते आहों किन्तु ऐसान करेक लाई मोके विवश तोहरेहे कईरा। तोहरे तो मोर प्रशंसा करेक लईग रहे यदियो वैसान तो मॉय कोनो न लगों लेकिन तोहरे केर उ “महा प्रेरितमान” से मॉय कोनो रकाम भी छोटो नैखों। १केखो प्रेरित सिद्ध करेक वाला आश्चर्यपूर्ण संकेत, अद्भुत काम आउर आश्चर्य काम

भी तोहरे केर बीच धीरज केर सागें प्रकट कराल जाहे। मोंग्र हर रकाम केर यातना झेईलों। चाहे संकेत होक, चाहे कोनो चमत्कार या आश्चर्य काम १३तोहरे दोसरा कलीसियामान से कोन दृष्टि से कमती आहा? सिवाय ईकार कि मोंग्र तोहरे केर ऊपरे कोनो रकाम भी कोनो भार नी बईनों? मोके ईकार लाई क्षमा करबा।

१४देखा, तोहार टिन आवेक केर लाई एखान मोंग्र तीसरा बार तैयार आहों। लेकिन मोंग्र तोहार ऊपरे कोनो रकाम केर बोझ नी बनबों। मोके तोहरे केर सम्पत्तिमान केर नई तोहरे केर चाहत आहे। काहेकि छौवामान के अपन माँए-बाप केर लाई कोनो बचत करेक केर लाई आवश्यकता नी होवेला लेकिन अपन छौवामान केर लाई माँए-बाप के हे बचत करेक होवेला। १५जहाँ तक मोर बात आहे, मोर टिन जे कुछ आहे, तोहरे केर लाई खुशी केर साथ खर्च करबों हियाँ तक कि अपन के भी तोहरे केर लाई खर्च कईर देबों। यदि मोंग्र तोहर से अधिक प्रेम करोना, होले तोहरे मोके कमती प्यार कैसान करबा।

१६होए सकेला, मोंग्र तोहार ऊपरे कोनो बड़का बोझ नी डालाथों किन्तु (तोहरे केर कहेक आहे) मोंग्र कपटी राहों मोंग्र तोहरे के अपन चालाकी से फँसाए लेलों। १७का जे आदमीमान के मोंग्र तोहार टिन भेजाए राहों, उमान केर द्वारा तोहरे के टाईक रहों कि? नई! १८तितुस आउर उकार सागें हमार भाई के मोंग्र तोहार टिन भेईज राहों। का उ तोहरे के कोनो धोखा देईहे? नई का हमरे उ निष्कपट आतमा से नी चलते रही? का हमरे ओहे चरण चिन्हामान में नी चईल्ही?

१९एखान तोहरे का ईके सोचाथा कि एकटु लम्बा समय से हमरे तोहरे केर सामने अपन पक्ष रखाथि कईके। किन्तु हमरे तो परमेश्वर केर सामने मसीह केर अनुयायी केर रूप में बोलाथि। मोर प्रिय संगीमान! हमरे जे कुछ भी कराथि, उसोउब तोहरे के आध्यात्मिक रूप से शक्तिशाली बनाएक केर लाई हेक। २०काहेकि मोके डर आहे कि कहीं जेखान मोंग्र तोहार टिन आबों होले तोहरे के वैसेनाहे न पाबों, जैसान पावेक चाहाथों आउर तोहरे भी मोके वैसेनाहे न पावा जैसान मोके पावेक चाहाथों। मोके डर आहे कि तोहरे केर बीच मोके कहीं आपसी झगडा, ईर्ष्या, क्रोधपूर्ण कहा-सुनी, आदमीगत षड्यन्त्र, अपमान, काना-फूसी, हेकड़पन आउर अव्यवस्था न मिलोक। २१मोर डर आहे कि जेखान मोंग्र फिर तोहरे से मिलेक आबों होले तोहरे केर सामने मोर परमेश्वर कहीं मोके लज्जित न करोक; आउर मोके उ बहुतझन

केर लाई विलाप न करेक पड़ोक जेमान पहिले पाप कईराँए आउर अपवित्रता, व्यभिचार तथा भोग-विलास में डूबाल रहेक से पछतावा नी कईराँए।

अतिम चेतावनी आउर नमस्कार

१३ ईटु तीसरा अवसर हेके जे मोंग्र तोहरे टिन आवाथों। शास्त्र कहेला: “हर बात केर पुष्टि, दुई या तीन गवाहिमान केर साक्षी में कराल जाई।” १जेखान दोसरा बार मोंग्र तोहरे केर सागें राहों, मोंग्र तोहरे के चेतावनी देई राहों आउर एखान जब मोंग्र तोहरे से दूर आहों, मोंग्र तोहरे के फिर चेतावनी देवाथों कि यदि मोंग्र फिर तोहरे टिन आबों होले जेमान पाप कईराँए आउर जेमान पाप करते आहोंए उमान के आउर दोसरे आदमीमान के भी नी छोड़बों। ३ऐसान मोंग्र ईकार लाई कहाथों कि तोहरे ई बात केर प्रमाण चाहथा कि मोर में मसीह बोलेला सेकार। उ तोहार लाई निर्बल नैखे, लेकिन समर्थी आहे। ४ई सच हेके कि उके उकार दुर्बलता केर कारण क्रूस में चढ़ाल गेलाक किन्तु एखान उ परमेश्वर केर शक्ति केर कारण जीयाथे। ई भी सच हेके कि मसीह में स्थित हमरे निर्बल आही किन्तु तोहरे केर लाभ केर लाई परमेश्वर केर शक्ति केर कारण हमरे उकरे सागें जीबोई।

५ईके देखेक केर लाई अपन के परखा कि का तोहरे विश्वासपूर्वक जीयाथा कि नई। अपन जाँच पड़ताल करा अथवा का तोहरे नी जानाला कि उ यीशु मसीह तोहरे केर भीतरेहे आहे। यदि ऐसान नैखे, होले तोहरे ई परीक्षा में पूरा भाल से नी उताईरा। ६मोंग्र आशारा कराथों कि तोहरे ईके जाईन जावा कि हमरे ई परीक्षा में कोनो भी करण से विफल नी होही। ७हमरे परमेश्वर से प्रार्थना कराथि कि तोहरे कोनो बुराई न करा। ईकार लाई ओहेके करा जे उचित हेके। चाहे हमरे ई परीक्षा में विफल होले भी नी देखाई देबोई। ८आसल में हमरे सच्चाई केर विरुद्ध कोनो करेक नी सकिला। हमरे तो जे करिला, सच्चाई केर लाई हे करिला।

९हमार निर्बलता आउर तोहरे केर बलवन्ता हमरे के खुश करेला आउर हमरे ईकरे लाई प्रार्थना करते रहिला कि तोहरे दृढ़ से दृढ़तर बना। १०ईकार लाई तोहरे से दूर रईके भी मोंग्र ईसोउब बातमान के तोहरे के लिखाथों ताकि जेखान मोंग्र तोहरे केर बीच जाबों होले मोके प्रभु केर द्वारा देवाल अधिकार से तोहरे के हानि पहुँचाएक केर लाई नई लेकिन तोहरे केर आध्यात्मिक विकास केर लाई तोहरे केर सागें कठोरता नी बरतेक पड़ोक।

११एखान हे भाईमान, मोंयं तोहरे से विदा लेवाथों। अपन आचरण ठीक रखबा। वैसानेहे करते रहा जैसान करेक केर लाई मोंयं कहालों। एक जैसान सोचा। शांतिपूर्वक रहा। जेकार से प्रेम आउर शांति केर परमेश्वर तोहरे केर सागें रही।

१२पवित्र चुम्बन द्वारा एक दोसरे केर स्वागत करा। सोभे पवित्र जन मान केर तोहरे के नमस्कार।

१३तोहरे केर में प्रभु यीशु मसीह केर अनुग्रह, परमेश्वर केर प्रेम आउर पवित्र आतमा केर सहभागिता तोहरे सोउब कोई केर सागें रहोक।